

欽定大清會典事例

欽定大清會典事例卷三百六十六

禮部

學校 學校設官

學校設官。○順治初。各省以次戡定。設提督順天學政一員。提督江南江甯等處學政一員。蘇松等處學政一員。河南山東山西浙江陝西江西湖南湖北福建四川廣東廣西貴州雲南。設按察司僉事。提調學政各一員。又設宣大二鎮提調學政一員。改江甯國子監為江甯府學。設教授訓導各一員。○又定遼東十五學。寄設直

隸永平府。於都司學設教官一員。兼管自在。瀋陽鐵嶺。開原。四學。於甯遠學設教官一員。兼管前屯。錦州。義州。右屯。四學。於廣甯學設教官一員。兼管永甯。海城。蓋平。定遼。右衛。五學。其復州。金州。二衛學。附入山東萊州府。置教官二員。○五年。改設遼學於永平。留遼學教官一員。其餘永平二員。及山東萊州二員俱裁。○七年。裁蘇松學政。歸併江甯。裁湖南提學道。歸併湖北。○八年。江南提督學政。仍分為江甯等處一員。蘇松等處一員。○十年。江南學政。分為江安等處

一員。淮揚等處一員。○十一年。設遼陽府學。其永平府遼學生員。俱歸遼陽肄業。○又覆准商籍生員。長蘆鹽運司所屬。在直隸者。附河間府學。在山東者。附濟南府學。兩淮所屬。附江南揚州府學。兩浙所屬。附浙江杭州府學。陝西所屬。附甯夏府學。河東運城別設運司學。○又定。江南。江北。提督學院。改為提學道。○十三年。設遼陽府遼海二縣儒學。○十四年。設甘肅甯夏等衛儒學。○又復設廣東雷連各徭崗社學一所。教讀一人。○十五年。裁宣太二鎮學政。歸併山

西提學道管理。○又歸併四川松潘衛學於茂州學。○十六年題准。直隸山海宣府衛學。邊遠無可歸併。仍行照舊。其懷來永甯衛學。歸延慶州。保安衛學。歸保安州。龍門所學。歸開平州。昌平衛學。歸昌平州。○又題准。湖南辰州五寨照例設學。令辰州府訓導分攝。○康熙元年。裁江北提學道。歸併江南提學道考試。○二年。設廣西各屬儒學教授官。○四年。設奉天各府州縣等儒學。照順天例。為京府大學。遼陽甯遠海城。為中學。蓋平鐵嶺。廣甯為小學。○五年。改雲南

廣西府學訓導為府學教授。平定。建水。雲龍。南安。四州學訓導為州學正。祿豐。羅次等十二縣學教諭俱為訓導。通省共設府衛學教授十八員。州學學正二十三員。縣學教諭九員。訓導十五員。○又設四川會川衛學教授一員。貴州桐梓。綏陽。仁懷。三縣學訓導各一員。○又議准。湖廣黎平府學改隸貴州。其教職仍循其舊。○六年。改設雲南開化府教授。訓導各一員。○八年。改雲南尋甸府為州。府學教授改為州學正。其維摩。順州二州。及歸化。三泊。陽宗。亦佐。硯嘉。五

縣教官俱行裁汰。○又改直隸大甯都司學為保定府左衛學。萬全都司學為宣化府前衛學。○十五年順天遵化縣升為遵化州。設學正訓導二員。○二十二年復設直隸阜平縣學教諭一員。○二十三年改江南浙江兩省提學道俱為提督學政。○二十四年設福建臺灣府府學教授一員。臺灣鳳山諸羅彰化四縣教諭各一員。○二十六年改貴州大定府學為州學。改府學教授為學正。訓導仍循其舊。○又覆准直隸懷來永甯保安三衛仍各設學。令保安州學延

慶州學兼攝。○二十八年議准。四川奉節縣為夔府首邑。又兼大甯歸併。裁撥府學訓導為奉節縣學訓導。○又覆准。貴州貴筑縣照例設學。令新貴縣學官兼攝。○三十一年。設雲南師宗雲州學正。新平定邊。元謀。教諭各一員。訓導如舊。○三十二年覆准。湖廣五開衛學。令靖州學兼攝。○三十三年。雲南曲靖。澂江。廣西元江。開化。順甯。武定。景東。八府。尋甸。建水。新興。趙州。劍川。五州。昆明。宜良。河陽。楚雄。定遠。保山。六縣。各增設訓導一員。○三十四年。貴州裁新貴縣學。

○又改設雲南平彝縣教諭訓導各一員。○三十七年。改雲南北勝州為永北府。改學正為教授。○三十八年。增設貴州清浪衛學教授一員。開州。廣順。永甯。獨山。麻哈。五州學學正各一員。普安。餘慶。安化。普定。平越。都勻。鎮遠。銅仁。龍泉。永從。十縣學訓導各一員。○四十二年。設雲南昆陽。彌勒。陸涼。馬龍。霑益。雲龍。六州訓導。南甯。河陽。呈貢。雲南。江川。五縣教諭各一員。○又議准。四川省五十七學。各增設訓導一員。○四十三年。貴州貴陽。安順。平越。都勻。鎮遠。思州。思南。

石阡銅仁黎平威甯等十一府。定番廣順開州
普安鎮甯黃平黔西平遠大定等九州。平溪清
浪二衛學。各設訓導一員。貴筑龍里貴定修文
普安安南安平清鎮甕安湄潭清平施秉印江
婺川畢節永甯餘慶等十七縣學。各設教諭一
員。○又設貴州永甯麻哈獨山三州學訓導各
一員。普定平越都勻鎮遠安化龍泉銅仁永從
八縣學教諭各一員。○四十四年。設雲南廣南
麗江二府學教授訓導各一員。其滇省土人有
願考者。准以民籍應試。○四十六年議准。廣西

義甯等十三縣增設教諭十三員。永甯等七州。平樂等三縣及思明土府增設訓導十一員。○五十一年覆准。廣西西隆州已建學宮。移武緣縣訓導駐紮。以專督課。○五十三年覆准。湖廣鎮溪所修建學宮。以瀘溪學訓導就近兼攝。○五十四年。設湖廣鍾祥縣教諭訓導各一員。○又覆准。貴州南籠廳修建學宮。分普安學訓導司學務。○五十五年定湖廣岳州府湖西六屬。以洞庭湖間隔不便應試。別於澧州分考。移府學訓導駐澧州。為岳西府學專司其事。○五十

九年。裁貴州黃平衛。歸入黃平州學。○六十年。復設四川岳池縣訓導一員。○雍正元年。覆准廣西太平土州設立學宮。移養利州訓導駐紮。專司督課。○又覆准廣西西陵縣改土歸流。移思恩府學訓導駐紮。專司督課。○二年。增設湖南學政一員。○三年。改直隸天津衛學為州學。裁保定。延慶等處衛所學。歸併府州學內。以天津教授為學正。裁保定左所教授。訓導各一員。○又增設安徽學政。分上下兩江考試。○又設廣西崇善。荔浦二縣儒學。撥太平府訓導駐崇

善。宜山縣訓導駐荔浦。○又議准。陝西甯夏。西甯。涼州。甘州。四府。設教授。訓導各一員。靈州設學正一員。甯夏甯朔。中衛。西甯。武威。永昌。鎮番。山陽。張掖。山丹。十縣。設教諭各一員。平羅。碾伯。古浪。平番。四縣。設訓導各一員。高臺縣設教諭。訓導各一員。○又議准。江南原設之太倉州。留學正一員。長洲。吳縣。常熟。崑山。嘉定。華亭。婁縣。青浦。上海。武進。無錫。宜興。十二縣。留教諭各一員。新分之元和。震澤。昭文。新陽。寶山。鎮洋。奉賢。金山。福泉。今裁南匯。陽湖。金匱。荆溪。十三縣。撥

訓導各一員。○又設山西朔平甯武二府教授
訓導各一員。右玉。偏關。二縣教諭訓導各一員。
甯武縣教諭一員。左雲。平魯。神池。五寨。四縣及
大同府屬陽高。天鎮。二縣訓導各一員。○四年
定各省學道一體改為學院。如部郎等官奉差
提督學政者。均加以翰林院編修檢討職銜。○
又覆准。山西威遠衛學廩增附生撥入朔平府
學。老營所學廩增附生撥入武甯府學。其神池
利民。八角。三堡。先進甯武學者。改歸神池學。鎮
西衛先進岢嵐州學者。改歸五寨學。其餘衛所。

照改設新縣歸撥均由各該教職督課。○又設順天府學滿洲教授訓導各一員。禮部於滿洲進士舉人貢生內考取文理優者擬定正陪送吏部引

見進士舉人授為教授恩拔副榜歲貢授為訓導。○

又增設奉天府永吉州學正一員。長甯縣教諭一員。○五年

諭臺灣遠隔重洋向來督學官員難以按臨考試是以將學政交與臺灣道兼管。朕思道員管理地方之事又兼學政未免稍繁。每年既派御史二員前往臺灣

巡查。應將學政交與漢御史管理。甚為妥協。現今御史在彼。著即辦理臺灣學政。嗣後永著為例。○又改湖廣之五開。清浪。平溪。銅鼓。各衛為縣。俱隸貴州省。以五開為開泰縣。清浪為清溪縣。平溪為玉屏縣。均設教諭。訓導各一員。銅鼓為錦屏縣。改教授為教諭。訓導仍循其舊。○又陝西裁潼關衛學。文武生童歸併華陰縣學。○又山東裁萊州府。復州。金州。二衛。歸併奉天府府丞考試。○又改貴州南籠廳為府。置教授。訓導。改普安州。訓導為學正。設永豐州學正。安南縣訓導各

一員。○又改設雲南宣威州學正。思樂縣教諭各一員。○又復設四川華陽縣羅江縣教諭訓導各一員。○六年。改設雲南東川烏蒙二府教授。鎮雄州學正。永善縣教諭各一員。○又改四川資縣為直隸州。教諭為學正。○又改設四川會理州學正。訓導。西昌。冕甯。鹽源縣教諭。訓導各一員。○又改設四川越嶲廳教授。訓導。雷波廳。訓導各一員。○又復設四川雙流。崇甯。彭縣。璧山。大足。定遠。彰明。威遠。青神。彭山。安岳等縣。訓導各一員。○又增設山東魚臺縣學訓導一

員。福山縣學教諭一員。○又設四川黎大所學。撥榮經縣學訓導一員。專司督課。○七年覆准。雲南普洱府學教職。於元江府學調訓導一人。以司啟迪。其從前附入元江府學各生。令撥入普洱。該學政別造清冊報部。○又

諭。廣東盜案繁多。民俗獷悍。應設觀風整俗使一員。化導訓飭。令人心漸歸醇厚。又該省督撫奏稱粵東士習未能端謹。請設學政二員。一司文衡。一飭士行。以爲造就人才之地。朕思文行本屬相關。不可離而爲二。况廣東地方遼闊。若司文司行。分屬兩員。仍各徧

歷通省耳目聞見恐有未周著設學政兩員按該省
地方分管考試督學廣東觀風整俗使著通省士子
令其概行稽查○又設廣東肇高學政廣韶學政各
一員○又議准湖南九澗永定二衛小學裁併
一縣為大學改湖北施州衛學為恩施縣學○
又四川裁會川衛學歸併會理州定為中學○
又改甘肅徽州為縣學正為教諭○又改山西
蒲州澤州直隸州為府學正為教授設永濟鳳
臺二縣教諭訓導各一員移臨晉縣訓導駐紮
虞鄉○又復設四川大甯新甯二縣訓導各一

員。○又改設湖南永順府教授。永順。龍山。保靖。桑植。四縣訓導各一員。安福縣教諭。訓導各一員。○又改四川雅州直隸州為府。學正為教授。設天全州。清溪縣。訓導各一員。○又改設四川松潘廳教授。訓導各一員。○又奉天裁泰甯縣教諭一員。○又設陝西榆林府教授。榆林。懷遠。二縣。及延安府定邊。靖邊。二縣。訓導各一員。○又改設甘肅鞏昌府洮州廳教授。岷州學正。靖遠縣教諭。訓導各一員。○又設雲南宣威州學正一員。○又議准。湖北黃陂。孝感。二縣。改歸漢

陽府管轄。其原撥黃州。德安二府各生。改歸漢陽府學。○九年。改直隸天津州為府。並設天津靜海二縣。府學置教授。訓導各一員。天津縣學置教諭一員。靜海縣學置教諭。訓導各一員。○又設廣東鶴山縣訓導一員。○又改貴州大定州為府。學正為教授。威甯府為州。教授為學正。訓導各循其舊。○又設順天府甯河縣教諭。訓導各一員。○又改湖南澧州為直隸州。裁岳西府學。該訓導仍歸岳州府駐紮。其岳東府學。仍改為岳州府學。○又九谿永定二衛軍戶屯田。

俱散在澧州等處。合二衛改為一縣。所有該衛文武各生。照依戶口田糧分隸。附近新縣者。撥歸新縣。遠在各屬者。撥歸各屬應試。○又改雲南烏蒙府為昭通府。於附郭置恩安縣。未設學。其學務仍隸府學教授兼攝。○十年奏定。順天府童生考試。除大興宛平二縣屬府丞專理外。其餘二十三州縣。於州縣考試後。俱由霸昌道錄取轉送。諸多不便。嗣後就近改歸四路同知。按所屬州縣錄取轉送。○又覆准。直隸天津州改為府。滄州亦歸天津府屬。其長蘆鹽運使司

所屬商籍生員。向附河間府學者。嗣後改附天津府學考課。○又設湖南鳳凰廳教諭。乾州廳訓導各一員。○十一年。改江蘇徐州學為徐州府學。於附郭置銅山縣。以州學正為府教授。以徐州原設之訓導管新縣學事。鳳陽府屬之壽州分置鳳臺縣。即以壽州原設之訓導管縣學事。○又改廣東程鄉縣為直隸嘉應州。改教諭為學正。○又設廣西鎮安。泗城兩府教授二員。東蘭歸順兩州學正二員。思明土府新改為土州。歸甯明州。照州學例設學正一員。梧州府

博白。北流。陸川。興業。四縣。改隸鬱林直隸州。其教職俱循其舊。○又設福建臺灣府學及臺灣鳳山。諸羅。彰化。四縣學訓導各一員。○又議准江都。新分。甘泉。縣學。山陽。鹽城。新分。阜甯。縣學。各以訓導分司督課。○又設福建福甯府學教授一員。於附郭置霞浦縣。設訓導一員。其福州府所屬之古田縣。雙溪地方。新置屏南縣。設訓導一員。又泉州所屬之永春縣。改為直隸永春州。漳州所屬之龍巖縣。改為直隸龍巖州。二學教諭俱改為學正。其訓導仍舊。○又設奉天府

復州。義州。學正各一員。甯海縣設教諭一員。○
又復設河南南召縣學。以南陽縣訓導管理學
務。○又改河南陳州。許州。為府。各設教授一員。
其陳州府新設附郭淮甯縣。許州府新設附郭
石梁縣。並以二州舊設訓導管理縣學。○十二
年。設山東博山縣訓導一員。○又改陝西同州
直隸州為府。學正為教授。設大荔縣教諭。訓導
各一員。○又設湖南永定縣訓導一員。○又改
山東大嵩衛為海陽縣。成山衛為榮成縣。設教
諭各一員。其靖海衛童生。附海陽縣考試。威海

衛童生附榮成縣考試。○又裁山東鼇山衛及雄崖浮山二所歸即墨縣管轄。靈山衛歸膠州管轄。其原設教授裁。○又改山東曹州為曹州府。泰安州為泰安府。各設教授一員。其原設州訓導俱改為二府附郭新縣訓導。○又改山東武定沂州兩州為府。各設教授一員。其原設州訓導俱改為二府附郭新縣訓導。○乾隆元年議准廣東惠州府屬之興甯長樂二縣學潮州府屬之平遠鎮平二縣學改歸嘉應直隸州管轄。○又改湖北彝陵州直隸州為宜昌府學正

為教授。設東湖縣教諭一員。○又改湖南沅州直隸州為府。學正為教授。設芷江縣訓導一員。○又改設四川酉陽州。學秀山縣。縣學訓導各一員。○二年。改安徽潁州直隸州為府。學正為教授。以訓導為阜陽縣訓導。○又奉天裁長甯縣學。歸併永吉州。○三年。覆准。移甘肅臨洮府。並附府之狄道縣。駐蘭州。改蘭州學為府學。擇地別建皋蘭縣學。改狄道縣學為州學。改臨洮府學教授。訓導為蘭州府學教授。訓導。即以蘭州學正。訓導。改撥狄道州。皋蘭縣教諭。訓導。

仍循其舊。○四年。直隸設立臨榆縣學。○五年。設廣東豐順縣訓導一員。○六年。覆准四川樂山縣學改為嘉定府學。三臺縣學改為潼川府學。樂山。三臺。二縣學。即各附府學之內。毋庸別建學宮。升樂山縣教諭為嘉定府學教授。三臺縣學教諭為潼川府學教授。其原設樂山。三臺。二縣學訓導。仍循其舊。○又改河南許州府為直隸州。改府學教授。訓導為州學學正。訓導。○七年。貴州設立永豐州學。○八年。覆准甘肅口外安西。沙州。靖逆。柳溝。赤金。五衛。生員。向隸肅

州學管轄。路程遼遠。嗣後於五衛適中之安西衛。設教授一員。五衛生員。均撥歸該教授管轄。○又設江西蓮花廳訓導一員。○十二年。奉天裁永吉州學正一員。○又陝西裁潼關縣。設潼關廳。改潼關縣訓導為廳學訓導。○十六年。廣東裁肇高學政。歸併廣韶學政考試。○十七年。議准。福建巡臺御史。定為三年一次派往。事竣即回。其提督臺灣學政關防。仍令臺灣道兼管。○十九年。議准。安徽臨淮縣裁併鳳陽。其原隸臨邑住址生童。另編臨淮鄉學字樣考試。將鳳

陽縣訓導。分管臨淮鄉學。董率士子。○二十一年。湖南分設清泉縣。改衡陽縣訓導為清泉縣訓導。○二十二年。議准直隸蔚縣裁歸蔚州。原隸蔚縣住址生童。另編鄉學字樣。所有蔚州學正。仍管本學事。其訓導令專管鄉學。以專責成。○二十三年。直隸裁大名府屬之魏縣。撥入元城縣。原隸魏縣住址之生童。另編鄉學字樣。並令大名縣訓導一員。專管鄉學事務。○又改江西甯都縣為直隸州。教諭為學正。○又設甘肅大通縣訓導一員。○二十五年。湖南裁辰溪縣。

訓導。改設永綏廳訓導一員。○二十六年議准。
直隸延慶衛歸併延慶州管轄。改延慶衛訓導
一員。為延慶州鄉學訓導。文武生童。另編鄉學
字樣。歸併宣化府考試。○又改甘肅華亭縣屬
之瓦亭驛。何家大堡。隸固原州。其瓦亭驛。何家
大堡等處文武生員。俱改歸固原州學。○二十
七年。湖廣沔陽州分設文泉縣。改沔陽州訓導
為文泉縣訓導。○二十九年。山西清源縣歸併
徐溝。改縣學為清源鄉學。另編鄉學字樣。移徐
溝縣訓導駐清源鄉學。董率士子。○又議准。山

西平順縣。歸併潞城。黎城。壺關。三縣管理。其原隸平順住址之文武生員。另編平順鄉學字樣。已裁之平順縣訓導。仍留鄉學管理。即隸潞城縣管轄。○又改設甘肅安西府教授。暨淵泉。玉門。敦煌。三縣訓導。各一員。○又山西裁甯武府。偏關縣教諭。留訓導專司督課。○三十年。河南河陰縣。歸併滎澤。改河陰縣教諭為河陰鄉學教諭。其生童試卷。另編鄉學字樣。○三十一年。議准。雲南普洱自政府之後。又設有甯洱一縣。府縣止有訓導一員。嗣後改為教諭。以專訓課。

○三十二年議准。湖北鶴峯州及長樂縣。自改土歸流後。人文頗有可觀。一體設學。改長陽縣訓導為鶴峯州訓導。興山縣訓導為長樂縣訓導。○三十三年。改江南東臺同知為東臺縣。設訓導一員。○三十六年。改雲南永北蒙化。景東三府均為直隸廳。教授訓導各仍其舊。元江廣西鎮沅武定四府為直隸州。鶴慶府為鶴慶州。教授各為學正。祿勸彌勒師宗建水四州為縣。學正各為教諭。其原設訓導各循其舊。裁姚安府教授。訓導和曲州學正。訓導設順甯縣教諭。

訓導各一員。麗江縣教諭。訓導各一員。○又議准。湖北施南府設立府學。宣恩來鳳咸豐利川四縣。分設學額。並改宜昌府學訓導為施南府學訓導。東湖縣學訓導為來鳳縣學訓導。巴東縣學訓導為咸豐縣學訓導。歸州學訓導為利川縣學訓導。恩施縣學訓導為宣恩縣學訓導。○三十八年。改甘肅安西府為直隸州。裁淵泉縣。改淵泉縣訓導為該州學正。○又議准。巴里坤新設鎮西府。設府學教授一員。即由安西府移設。附府置宜禾縣。添設訓導一員。○又烏魯

木齊同知改設迪化州。添設學正一員。○又改江西定南縣為定南廳。所屬訓導仍循其舊。○又改雲南元江直隸州新平縣訓導為普洱府甯洱縣訓導。駐紮他郎。專司訓課。○三十九年。升甘肅迪化州為直隸州。教職仍循其舊。改甯邊州同為昌吉縣。設縣學訓導一員。○又改浙江海甯縣為州。安吉州為縣。以安吉州學正為海甯州學正。以海甯縣教諭為安吉縣教諭。其海甯安吉原設訓導仍循其舊。○四十一年。

諭。熱河各廳所屬編氓及僑居年久者。其子弟應不乏。

秀良誠能教育而振興之。未嘗不足以示造就。自宜創設義學。延師訓課。以勵文風。並當建立學宮。酌定庠額。俾得藉以上進。○又貴州裁改仁懷通判仁懷縣。為仁懷直隸同知。特立專學。仍設訓導一員。○四十二年。甘肅特納格爾等處。改設奇臺阜康二縣。並設儒學。○又甘肅裁莊浪縣。併入隆德縣。移靜甯州訓導。駐莊浪鄉學。○四十三年。改直隸熱河道學教授。為承德府學教授。○四十四年。四川石砭廳設立廳學。改夔州府訓導為石砭廳學訓導。○四十五年。四川馬邊廳設

立專學。改甯遠府屬之越嵩廳學訓導為馬邊廳學訓導。○四十七年。改陝西興安州為府。學正為教授。訓導仍循其舊。○五十年。甘肅循化廳專設學校。○五十五年。改陝西漢陰通判為撫民通判。設立專學。裁撥興安府學訓導為漢陰通判訓導。○五十六年。廣西天保縣設立專學。以鎮安府學教官兼管。○五十七年。四川天全州設訓導一員。○五十八年。議定。順天現設學政一員。專司其事。所有順天府府丞。即刪除兼提督學政銜字樣。○五十九年。四川秀山縣

設立專學。改松潘廳訓導為秀山縣訓導。○六十年。甘肅貴德廳設立專學。改西甯府訓導為貴德廳訓導。○嘉慶元年議准。山西樂平縣裁併平定州管理。改縣學教諭為樂平鄉學教諭。馬邑縣裁併朔州管理。改縣學訓導為馬邑鄉學訓導。均另編鄉學字樣。文武生員仍聽該訓導管束。○三年。改貴州平越府為直隸州。裁府學教授訓導。改平越縣為興義縣。將平越縣教諭訓導作為平越州學正訓導。移普安州訓導為興義縣訓導。○四年。貴州松桃廳設立專學。

移銅仁府學訓導。駐松桃廳。○六年。四川裁茂州屬保縣教諭。訓導。設綿州屬羅江縣教諭。訓導。各一員。○又定。奉天府丞。嗣後三年更換一次。○七年。升四川達州為綏定府。改州學學正。為府學教授。添設訓導一員。以茂州訓導裁改。改太平縣為達縣。移太平縣訓導。為達縣訓導。新設太平廳。添設訓導一員。以汶川縣訓導裁改。又理番廳添設教諭一員。○八年。浙江玉環廳設立專學。改温州府學訓導為玉環廳學訓導。其原附温州府學取進文武生員。撥回廳學。

管轄。○九年。四川雷波廳設立專學。移甯縣學訓導駐雷波。作為雷波廳學訓導。其從前附考鄰邑取進文武生員。撥歸廳學管轄。○十一年。改廣東嘉應州為嘉應府。置程鄉縣。改南雄府為南雄州。裁保昌縣。移南雄府教授於嘉應府。移保昌縣教諭訓導於程鄉縣。移嘉應州學正於南雄州。嘉應南雄訓導各如舊。○十六年。四川裁興文縣訓導。改設江北廳訓導一員。○又改貴州普安州學正為普安廳教諭。○又江蘇裁崇明縣訓導。改設海門廳訓導一員。○十七

年。改廣東嘉應府仍為嘉應州。添設學正一員。裁教授一員。○又議准。四川雅州府增設雅安縣學。○道光元年。四川城口廳設訓導一員。復太平廳為太平縣。設訓導一員。○四年。改湖北白河廳訓導為保康縣訓導。○又改河南儀封縣教諭為儀封鄉學教諭。○六年。設四川雅安縣訓導一員。○十二年。改貴州錦屏縣教諭為錦屏鄉學教諭。○二十年。移雲南師宗縣訓導為邱北縣訓導。改鎮沅州學正為鎮沅廳教授。恩樂縣教諭為鎮沅廳復設訓導。○咸豐二年。

改雲南甯洱縣復設教諭為普洱府復設訓導。
○五年。改甘肅新疆鎮西府為直隸廳。裁府學
教授。改設廳訓導一員。○同治六年。奉天昌圖
廳設訓導一員。○九年。奉天岫巖廳設訓導一
員。○又改設安徽渦陽縣訓導一員。○又改廣
東陽江直隸州學正。訓導為陽江廳教諭。訓導。
○十年議准。黑龍江應試取進士子。歸吉林學
就近管束。○十一年。甘肅安化縣董志鄉學。增
復設訓導一員。○又改福建臺灣府淡水廳復
設訓導為復設教諭。增噶瑪蘭廳復設訓導一

員。○光緒元年。陝西甘肅鄉試分開。另設甘肅學政一員。○二年。設廣西恩隆縣訓導一員。百色直隸廳學正一員。○三年。設奉天奉化縣訓導一員。改設昌圖府教授一員。○又設甘肅甯靈廳教授一員。○四年。廣西奉議州設學正一員。○又設福建臺灣臺北府教授一員。改噶瑪蘭廳復設訓導。為宜蘭縣復設訓導。改淡水廳復設教諭。為淡水縣復設教諭。○五年。黑龍江呼蘭廳學設學正一員。○六年。改甘肅鎮西府訓導為鎮西直隸廳訓導。○七年。設雲南安平。

思茅他郎龍陵四廳復設訓導各一員。文山寶甯二縣復設訓導各一員。巧家威遠二廳會澤縣訓導各一員。○八年。改設吉林府教授一員。伊通州。雙城廳各設訓導一員。○又設甘肅甯夏府教授一員。○十年。設奉天康平縣訓導一員。○十一年議准。山西省歸綏道屬之歸化。薩拉齊。和林格爾。托克托。清水河。豐鎮。甯遠七廳。於歸化廳設立總管七廳學校事務教諭一員。○十二年。改設甘肅新疆迪化府教授一員。○十三年。移廣東欽州訓導為防城縣訓導。○又

設湖南南洲直隸廳教諭一員

欽定大清會典事例卷三百六十七

禮部

學校 學政考覈

學政考覈。○順治八年定。學臣報滿。照例考覈。公明者優升。溺職者叅處。歲科兩考完日。即報部銓補。新舊交代。以杜署事諸弊。學臣以到任日為始。歲考限十二月考完。每三月解卷一次。科考分四次解卷。以憑磨勘。所取生童文字。以純正典雅為主。詭謬者本生褫革。學臣分別卷數之多寡。議處生員不許聚眾結社。糾黨生事。

及濫刻選文窗稿。教官生員不遵條教者。學臣嚴行懲治。若與武職兵丁有爭。教官生員聽學臣處治。不許武職擅責。武職兵丁聽該衙門處治。不許生員結黨爭抗。學官不宜懸缺致曠職業。撫臣按缺題請。下吏部銓補。其有不由科貢出身濫冒教職者。一併題明送部另用。若署事教官。止用本學及別學。不得濫委雜流。○又題准。學臣新舊相接。除御史報代自有臺規外。凡學道兩考完日。先期報禮部。即咨吏部銓補。新官依限赴任。面相交代。以杜署事諸弊。其舊官

聽候考覈升轉處分。○九年題准。學政歲科兩考。定以三年內報完。仍俟新任面代。不許擅離地方。○又題准。歲科試卷優等。以大學五名小學三名解部磨勘。其有詭僻幽險割裂補綴者。照題定卷數分別叅處。解卷時必用原本真卷。不許改謄潤色。解期務照題定次數。不許遲延。違者叅處。○十五年題准。各提學有能將上官勢要封函揭送者。於考覈時並為敘錄。○康熙元年題准。學道任滿考覈改隸吏部。○二年題准。提學每一次解卷內磨勘出一卷者。罰俸六

月。二卷罰俸九月。三卷罰俸一年。四卷降一級。
五卷降二級。六卷革職。○又題准。直省現任提
學。於鄉試前接考小半及一半者。所屬未考地
方尚多。仍通行考試。以完下三年考試一周之
數。其接考大半者。准其報滿。○七年題准。學政
考完兩府。即將原卷解部。○八年題准。學政考
後。每六箇月解卷一次。○十一年議准。新補學
政。一經領

款。次日即行赴任。至各省舊任學臣考試已竣。俱於
十一月內報滿到部。如違定限。即題叅處。○十

二年

諭近聞直隸各省學差沿襲陋規墮廢職業營私作弊考試不公以致真才淪棄文治不光今應作何整飭差遣何官及磨勘考覈之法何以盡善務期永革弊端著九卿科道會同詳確議奏欽此遵

旨議定直隸各省學臣所解之卷不能無改謄潤色嗣後停其解卷磨勘俟三年期滿督撫以稱職薦舉者照例以參議道用以公明尤著保舉者照例內升京堂若有徇情溺職等弊聽督撫指名題叅若督撫徇情不叅被科道糾叅或有別官

首出。將督撫一併議處。○又題准。學政考試遲延。限內不能完結者。降一級調用。○十八年題准。學政考過學冊。一年二季解部。由部將新舊學冊。嚴加校對。如有額外濫取蒙報者。題叅。○二十年議准。邊遠省分。地方遼闊。往往不能按時考試。有向例歲科聯考者。亦間有學政新舊交代試期稍迫。奏請歲科聯考者。其前列試卷。不能一概於歲科兩試後。即行分解部科磨勘。其餘省分。仍照例分解。毋得遲延。○二十二年。攝政。嗣後文武生員錄事。縣革。及審明收復。並

改歸原籍等項。該學院學道逐案開明報部。如有遺漏。即行議處。○二十五年題准。學政歲考畢。造簡明文冊解部科校對。科考畢亦如之。總計三年二次。其違限不解者。照例叅處。○二十年題准。學政於鄉試第二年接任。其未考地方多者。展限五月。少者展限三月報滿。若鄉試之年於試前接任。俟下次三年歲科試完報滿。○二十九年議准。學政考後造冊報部。有額外濫取改名易姓頂補此學。改入彼學等弊。或被督撫糾叅。或被部科查出。將學臣照貪官例革

職提問。賄進諸生。照光棍例治罪。○三十三年議准。各省學政造送學冊。其府學生員名下。查明本州縣籍貫。詳細填註。毋致舛錯。以備查覈。○又議准。學政於歲科兩試取進文武新生。發學後。即飭地方官將名數履歷造冊。呈送督撫備查。舊案文武生員。每逢歲科兩試。飭教官照格眼冊另造一本。牒送地方官。呈督撫衙門存案。○三十九年覆准。學臣歲考後。令解全冊一次。科考後。止將錄取生員姓名。幫補日月。及各項事故。分別開報。不必別造四柱全冊。○四十

年題准學臣歲科解冊均由驛遞。○四十五年覆准學政報部歲科冊內有錯誤者該部駁回改正其名數不符蒙混報部及頂冒等弊並不應補廩增而越補不應降青而竟降者奏交該督撫察明題叅。○五十年覆准學臣遇有丁憂等事離任將學政印務令該督撫或藩臬署理者定例不許考試其遇鄉試屆期但照科考正案送場署印不准錄送遺才。○五十三年議准凡學臣更替定於鄉試年之秋列名恭候

欽點以武闈後十月底到任為限舊學臣報滿即行

起程。○又議准。嗣後鄉試年分。更換學院學道。禮部將更換之處。開送吏部開列具題。差定之後。新學臣速行赴任。舊學臣報滿交代。即行起程。○五十四年定。各省學道報滿後。該督撫於一月內考覈具題。如逾一月者。將督撫照違限例處分。○雍正元年覆准。定例歲科兩考。各限一年考完。即將簡明文冊送部查對。惟歲考事務稍繁。嗣後歲考解冊。再寬限六月。以免遲延之咎。其科考仍照舊例遵行。至所造冊內有字畫訛落之處。不過謄繕偶誤。無關弊竇。免其駁

叅。行令學政自行改正。又

諭。朕惟自古帝王。皆以興賢育才為務。我

世祖定鼎中夏。首隆學校。加意人才。

皇考聖祖仁皇帝御極六十一年。培養教育。恬冒涵濡。深仁厚澤。有加無已。

御製訓飭士子文。頒布學宮。東西南朔。海澨山陬。戶習詩書。家敦禮樂。文教之隆。莫過於此。朕續承大統。遵守舊章。寤寐求賢。惟恐或失。念學校為士子進身之階。督學一官。尤人倫風化所繫。遴選學臣。倍加鄭重。爾等須廉潔持身。精勤集事。實行文風。兩者所當並

重。若徒事文華而不敦崇實行。猶未為盡職也。表揚忠孝節義。崇祀先聖先賢。訪求山林隱逸。搜羅名蹟藏書。而衡文一道。專以理明學正典雅醇潔為主。古人云。言乃心聲。氣由夙養。必士品端而後文風正。他日為國家柱石。為朝廟羽儀。不綦重歟。勿私納苞苴。勿瞻徇情面。勿輕視武途。勿濫取祠廕。勿矯激沽名。勿昏庸廢事。勿卑汙貶節。勿驕暴陵人。胥吏必謹關防。幕客尤宜選擇。如此則內外交結。本末兼修。上不負朝廷。下不愧多士。朕耳目所及。必有見聞。若罔顧聲名。廉隅不飭。國有常憲。罰必隨之。尚其勉旃。毋忽。

○二年奏准學政通計三年解冊兩次不必扣限。○三年

諭。從前學政主考。皆就其為人謹慎者派往。並未考試文藝。其中竟有不能衡文者。或中式後荒疏年久故耳。著將應考之翰林。並進士出身之各部院官員查奏。俟朕試以文藝。再行差委。○六年奏准。嗣後福建臺灣考試解部文冊。由兼理臺灣學政將一應冊卷。別具印文。附於福建學政一併送部。○十二年議准。學臣報滿時。將歲科報部文武生員等第。緣事開復游學隨任等項。並科冊報部後

之革項緣事開復補考補廩等項逐一備細造冊鈐印交與新任學臣其或新任學臣未到而舊學臣已經離任向例將學臣印信交與巡撫代理嗣後令學臣於交印之時將文武生員各項冊籍一併交與撫臣俟新任學臣到日轉行交明。十三年議准學政歲科造報各冊並學政新舊交代底冊內凡舊管新收開除實在四柱總數並開復補廩及生員等第緣事黜革等項所註廩增附青社緊要字樣遇有它補添註之處務令鈐蓋印信以杜弊竇仍將用印顆數

於冊尾開註。如有遺漏印信。以致書吏增減作弊者。除將書吏重究外。仍將該學政交部議處。○乾隆元年議准。學政案試其題報優劣。俱擇其尤者。次則悉於等第上下之。至於經學。凡應考生童。非熟本經者不錄。有能通習多經者。即拔前列以示獎異。其歲科前列十名試卷。俱著解送部科磨勘。分別議處議敘。○又議准。各部郎中。員外郎。主事。奉差學政者。照例加編修檢討職銜。將本任之缺。另行銓補。至升轉食俸之處。仍就該員原官與各部現任司員一體食俸。

遇應升時。吏部照例推升。具題請

旨。以升銜註冊。仍留學臣之任。俟三年任滿回京。各照缺補用。其郎中任滿。例應推升道府。如遇升選之時。准其以應升註冊。俟三年任滿考覈稱職。再行歸於月分。以應升之缺即用。○又議准。直省歲科兩考報部冊內。有緣事暫革生員。所犯在雍正十三年九月初三日及十一月十四日。

恩赦以前者。秉公確查。取問明白。造具詳細清冊。逐案報部覆覈。以定去留。督撫學臣並嚴飭該有司

官立限審結。逆案報部。如應結不結。將承辦有司官題叅。○四年議准。各該學政將欠考各生務令挨次補考。即於彙報歲科學冊內分別註明。以憑查覈。如有欠考數次。止補一次。及徑附正考等第者。即移咨吏部。照徇情蒙混例議處。○十一年奏准。各學冊所開詳革生員。未經分別開復除名。仍列緣事項下。閱三年以上者。行令督撫學政嚴查遲延之由。或案已審結。未經錄報。或懸案年久。並未審結。分別情事重輕。據實叅處。再各省州縣官。或於重案不能審出實

情。事隔多年。案由外結。部內無可稽查。惟內有
詳革生員先經冊報在部者。下次學冊。每捏開
病故完結。嗣後飭令各該學政。凡緣事生員。雖
已病故。務將斥革年月。曾否審結。及審定犯案
與開復除名之革生。一併摘敘簡明案由報部。
不得混於病故項下開除。○二十四年議准。嗣
後學政遇丁憂事故離任。督撫等署理印務。儻
遇鄉試之年。場期已近。新任學臣不能抵任錄
遺。准其錄送遺才。武生亦照文生一體辦理。○
二十五年議准。各省歲科取遺文章試卷。於造

冊送部時。通行解部磨勘。後移送禮科磨勘。其有命題怪僻。文體疵謬者。照例指叅。○又議准。嗣後歲科兩試童生試卷。仍照舊例。停其解部磨勘。○三十年議准。嗣後各省學政報滿。必照例俟新任學政到任交印。再行起程。其有對調及丁憂事故者。仍交督撫署理。○三十三年議准。嗣後各該學政。造送學冊。務將府學生員名下。詳細填註本州縣籍貫。毋致舛錯。以備查覈。○三十八年

諭。昨據禮部題駁四川學政吳省欽奏請科考文生錄

取二三等者。先將坐號一體榜示一本。已照部議駁。並將該學政吳省欽飭行矣。比詢及考試生員出案事宜。據大學士于敏中面奏。從前曾任浙江山東學政。俱按照舊時章程辦理。初案臨時先考生員。大府約考二棚。小府約考一棚。越二日即將一等諸生坐號招覆。迨覆試後數日。隨將閱定之二三等試卷。分別批評大概。交提調官拆卷填案。曉示發落。每試生員。大學不過十日。小學不過七八日。蓋緣優等諸生。例應面加獎勵。其劣等生員。亦應發落責懲。固未便令其先行散歸。亦未便令其久羈守候。且如學政案。

臨所至。總不宜令生童聚集。久居滋事。即如臣所歷
浙省之杭嘉湖。山東之濟東兗諸郡。均係殷庶之區。
並非艱於旅食。亦從不肯令與考諸生羣集久處。是
以歷來生員閱卷出案。為期從不過遲。各省情形。自
應大略相等。初不係地方有無公事。以為權衡。至吳
省欽以用兵措詞。尤屬毫無干涉。其所請將二三等
卷同時榜示坐號。更無此政體。但禮部議令邛雅等
屬。無難以招覆時。飭令不與錄取者聽其遄歸。俟大
兵凱旋。仍照章程辦理之處。亦未能切中肯綮。若如
部議。恐各省先考生員即行發落之舊規。因而更改。

於事轉屬未便。蓋學臣不能早為閱卷發案者。皆緣見小惜費。不肯多延幕友所致。應請通飭各該學政。實力妥辦等語。國家所給學政養廉。本屬豐厚。原以資其辦公之用。若於延致幕友。尚思靳惜廉金。不肯多延名幕。以致人少誤公。已昧人臣敬事之義。且任學政者。不思校士育才。而斤斤惟養廉是惜。其鄙陋尚可問乎。嗣後各省學政。務須通曉大體。多擇工於閱文之幕友。即極小省分。亦不得不及五六人。並著各督撫留心稽查。如有不肯多延幕友。辦理周章者。即隨時據實奏聞。毋得稍涉徇隱。○四十二年奏准。

各省學政由郎中等官補授者。照例推升。以其
次應升人員擬備。將該員應否留任學政之處
先行具奏請

旨。如留任者。以升銜註冊。其應升員缺。以擬備之員
升用。○五十八年奏准。京官出差學政。如遇升
京職。仍照舊例請

旨。如推升外任。無論何項員缺。即將學政開缺。○嘉
慶四年

諭。據王德岳起奏。會審宜興甄輔廷等分別治罪一摺。
軍機大臣擬將學政平恕交部嚴加議處。平恕於甄

輔廷擅責生員之時。本在外郡考試。及馬照等在馬頭喧鬧。經巡撫委員查辦。詳請責革生員。若不照詳批革。則是平恕庇護劣生。心存偏袒矣。是其過止於平日不能教導。而於詳革時人數較多。未經查察。以致傳提訊問。波及無辜。然地方官具詳請革生員。設使學政駁斥不准。地方遇有與學政交涉事件。必致有袒護劣生。掣肘地方之事。且此等革生。如審係無干。原可以開復。是平恕之罪亦不至罷斥。平恕著來京。以翰林院侍讀學士降補。○六年

諭。御史王蘇奏新放江蘇學政平恕請另行簡放。或酌

量改調一摺。內稱平恕前在江蘇斥革生員多名。人
人切齒。即商賈小民。無不痛恨。似乎恕實有不公不
法之處。因令軍機大臣傳到王蘇。詢以平恕有無別
項劣蹟。令其據實直陳。旋據王蘇登覆。仍不過稱平
恕辦理甄輔廷擅責生員一案。衆心不服。又稱平恕
考試生童。並無別項劣蹟等語。平恕前在江蘇學政
任內。如果有賄賣生員去取不公等弊。該御史當指
明據實叅奏。朕必嚴為懲辦。至其因甄輔廷案內斥
革生員多名一事。先經照部議鐫職。今該御史以業
經議結之案。仍列彈章。並稱或另請簡放。或酌量更

調試思平恕如不勝學政之任。既不宜於江蘇。豈復宜於他省。若平日並無劣蹟。此次復經簡用。益當顧惜聲名。用息浮議。固不可苛刻以斂怨。亦不應寬縱以沽名。儻平恕約束士子。仍不得當。或另有案據。亦何難將平恕罷斥治罪。豈有國家簡任學臣。因籍隸本省之御史。撫拾前事。一經劾奏。即行更換。是舉錯之權。操之言路。勢必如明季科道紛紛訐奏惡習。成何政體乎。所有江蘇學政仍著平恕去。御史王蘇著交部議處。○七年

諭。給事中陳昌齊條奏各款俱不可行。據稱各省督撫

並無稽查之人。行止難免專擅。請加學政以稽察之銜。遇督撫遲壓蒙混等弊。隨時舉奏等語。各省督撫如果有貪劣實蹟。及地方事件辦理不公。學政有奏事之責。原准其據實奏聞。候朕覈辦。若竟以稽查督撫之事。委之學政。則學政之權。豈不重於督撫乎。國家設立學政。原令其校士衡文。若如該給事中所奏。儻各省學政有稽察督撫之名。因而於地方公事。動輒干預。遇有私意不合。任情毀譽。又豈不開挾制之漸。設該學政有營私舞弊之事。又令何人稽察乎。況督撫俱係一二品大員。至各省學政。往往有由編檢

主事等官簡放者。品秩較小。若以之稽察督撫。亦非朝廷體制。前明設立巡按。最為有名無實。該給事中奏請加銜。豈非於督撫之外。又設一巡按乎。陳昌齊所奏迂謬。原摺著擲還。○八年奏准。各省府廳州縣共一千七百餘學。以每大學前列十卷。及小學不滿十名者。儘數一體解送。計算約共一萬餘卷。以奉天。順天。山東。山西。河南。陝甘。六省作一次磨勘。以江蘇。安徽。浙江。江西。福建。湖北。六省作一次磨勘。以雲南。貴州。四川。廣東。廣西。湖南。六省作一次磨勘。又學政係現任翰林及京堂

部曹曾由翰林出身者。交都察院派科甲出身之科道磨勘。學政係現任科道及京堂之曾任科道與學政係六部司員者。俱交翰林院派員磨勘。以杜同官瞻徇之弊。其由翰林改用科道者。兩衙門俱應迴避。則部派司員辦理。所派之員。均令迴避本省。俟磨勘完竣。三衙門各自具奏。○九年奉

旨。各省學政解到生員歲科前列試卷。向例由禮部會同禮科磨勘。此項試卷。本無關得失。且每次解卷多至四五千本。若令各該衙門紛紛磨勘。徒滋煩擾。著

照舊例。由禮部會同禮科磨勘。以歸簡易。○十一年
奏准。郎中等官補放學政。如推升外任。照例將
其次應升人員擬備。其應否留任之處。具奏請
旨。如奉

旨留任。擬升之缺。即以其次之員升補。其現任學政
不必給予升銜。以符體制。○又議准。磨勘各省
歲科前列試卷。有未知敬避

廟諱者。雖經缺筆。亦罰停鄉試一科。仍發學戒飭。其有
書

廟諱並未缺筆者。加等罰停鄉試二科。仍發學戒飭。學

政雖經圈出。仍每卷各罰俸六月。又試卷有詩
內少一聯者。罰停鄉試一科。廩生仍罰停廩餼
一年。增附生由本案補廩者。罰停廩餼一年。學
政未經抹出。罰俸六月。又試卷有鈔錄舊文者。
革去廩增生。仍留附生。附生隨棚覆考。均發學
戒飭。學政免議。又試卷有詩出韻及平仄不協
者。有字句欠妥者。有對策失口氣者。如列三名
以前。罰停鄉試一科。列四名以後。廩生。罰停廩
餼一年。增生。附生。由本案補廩者。罰停廩餼一
年。學政未經抹出。大省。每卷罰俸三月。小省。每

卷罰俸兩月。已經抹出者免議。又試卷面有貼補姓名者。提調官即行蓋印為記。有遺漏者。照疏忽例罰俸三月。所有磨勘出應議各卷。除應行斥革廩增者。分別辦理外。其應罰科各生。如本科業經鄉試。即罰停下科鄉試。又歲科考前列試卷。為數繁多。解部磨勘。有需時日。嗣後歲科考分作兩次磨勘。每歲科磨勘完竣。即請欽派大臣覆勘。其科考各卷。即交歲考覆勘大臣辦理。○十三年議准。各省學政解送歲科考冊。均以試畢後兩月出咨為限。其廩增冊。歲科兩試。

亦令解冊二次。均以截缺後兩月出咨爲限。如遇地方情形不同。有酌量變通之處。另行咨部覆議。又覆准江蘇向來於歲考之年。考試江甯蘇州松江常州鎮江揚州太倉通州八府州。次年春間。考淮安徐州海州三屬。其徐海二屬。係歲考之後。接連科考。再行科考淮安。俟淮安試畢。距歲考周徧之期。已逾兩月。嗣後仍照向例。歲冊於次年十月出咨。再江蘇科考。向於第三年五月事竣。七月案臨江甯。辦理錄遺事務。所有科考冊籍。亦照向例。於場後九月出咨。再

廩增生員赴部投捐。有在各省藩庫投捐者。照例以上捐日出缺。若俟知照到院。計須半年以外。又游幕在外。遇有丁憂事故者。均照向例按年彙冊咨送查覈。其廩增冊按年彙報。仍將由歲案科案幫補之處。於各名下註明。以便查覈。○又覆准。各省廩增冊。隨歲科兩考報冊二次。每年底加報一次。庶解部日期。不至遲延。○十四年覆准。安徽學政。除歲科廩增冊於截缺後咨報外。其歲科考冊。仍於錄送科舉後。統行咨報。○十七年議覆。已革湖南學政徐松。考試出

題割裂文義。並違例濫取脩生。不派教官監場。失察家人書役。轎夫勒索喜錢。散賣熟食。搶拾箭枝。並令優等生員出錢刊刻試卷各款。或咎止降罰。或贓非入己。均屬輕罪。其將書籍分派教官。轉令童生購買。除去工本銀兩外。計得餘利銀四百七十六兩。依律罪止杖一百。流三千里。惟該學政賣書漁利。種種失察。又復派令家人查號。割裂出題。以致士論沸騰。實屬狠鄙。不職。應請

旨發往新疆效力贖罪。嗣後學政家人書吏。儻有藉

稱喜錢名色索要錢文者。令該督撫嚴切申禁。毋得視為具文。致滋弊竇。○二十四年

諭御史程伯鑾奏請飭禁學政收受陋規一摺。貴州學政案試向有紅案銀兩名目。前經飭禁。並酌增養廉貼補考費。茲該御史奏四川省近日又有院費名目。並稱各直省所在有之。請旨飭禁。直省學政養廉優厚。足敷辦公。豈可復於新進士子收受陋規致開教官等需索之漸。著再行通諭各學政。務當潔己奉公。如有前項陋規名目。概行裁革。並飭所屬教官一體恪遵。以恤寒畯而端學校。○又議准。嗣後各省學政

開復已革生員。須候部覆准後。方准應歲科兩試。及鄉試錄遺。不得自行准其開復。致干叅辦。○二十五年覆准。嗣後學政造送歲科各冊。務將欠考各生註明次數。如有欠考三次者。即行斥革。不准列入留名項下。以符定例。○道光六年

諭。前據御史錢儀吉叅奏浙江學政朱士彥任性錯謬各款。當經降旨交程含章詳細確查。茲據該撫奏稱。原叅該學政終日沈湎。及教職小誤。輒加夏楚二款。查訊並無其事。惟該學政之父隨棚分閱試卷。出題

割截太甚。不成句讀。取進童生寫字錯訛。令教官掌責。及嘉興試院於場試畢。後演劇各款。原叅有因等語。浙省士風輕薄。朕所夙知。該學政遇事整頓。原無不合。惟伊父朱彬迎養到浙。止宜在署居住。不應隨棚閱卷。若亦幫同校閱。豈不與干預公事無異。試院演劇。雖係場事全竣。亦不應漫無關防。至生童勦襲舊文及字畫錯訛。原應豫行出示曉諭。誥誡有犯者。棄置不錄。究不宜出題割裂句讀。取進後輒予掌責。致滋物議。此數節。朱士彥不能辭咎。著交部議處。

十年

諭。朕聞安徽學政胡開益考試各屬士論未能翕服。降旨令蔣攸銑密行察訪。茲據奏胡開益上年考試徽州甯國二府屬歙縣涇縣等處取進文童。每有家資富足文理平常之人。一時士論未能翕服。即無賄屬情弊。而雇倩槍替懷挾鈔襲。在所不免。是胡開益局試場規不能嚴肅。已難辭咎。豈能勝學政之任。著來京以翰林院侍讀降補。○十二年

諭。前因山東學政盛思本任性乖張。致滋物議。當交部嚴加議處。並令鍾祥於山東途次。將盛思本考過各棚有無劣蹟。確切訪查。茲據奏稱途次查訪該學政

飲酒任意。馭下太寬。甚至編造歌謠。紛紛傳說。聲名實屬平常。惟考過各棚。據該府縣連銜密稟。尚無賊私之處。盛思本著照部議降四級調用。向來各省督撫。每於年終密奏學政聲名。嗣後直省學政如有聲名平常劣蹟昭著者。該省督撫立即叅奏。不必俟年終密陳。儻意存見好。扶同隱飾。經朕別有訪聞。惟該督撫是問。其籍隸本省之科道。如遇學政聲名狼籍。確有賊私實據。亦當隨時奏聞。毋稍緘默。○十二年議准。江西學政鄭瑞玉不能約束官親書吏。降

三級調用。○二十年

諭。湯金釗等奏。覆勘上年各省歲考前列試卷。其中漏印應議者。至一百三十餘卷之多。似此相沿成習。易滋流弊。此後應如何妥立章程。明定處分之處。著禮部議奏。欽此。遵

旨議定。嗣後歲科考試卷。各貢卷。均責成本學教官。於接扣處鈐印申送提調。儻有遺漏。即由提調補印申送學政。將教官咨部議處。如提調未經察出。即由學政補印。將提調教官一併咨部議處。如學政未經察出補印。經部磨勘。將學政提調教官一併議處。嗣後教官漏印一卷。罰俸六月。

二卷。罰俸一年。三卷以上。罰俸二年。如前列試卷全漏者。降一級留任。提調失察漏印一卷者。罰俸三月。二卷。罰俸六月。三卷以上。罰俸九月。十卷。罰俸一年。如失察至十卷以上。罰俸二年。學政失察漏印一卷者。罰俸一月。二卷。罰俸兩月。三卷以上。罰俸六月。十卷。罰俸九月。如失察漏印至十卷以上。罰俸一年。雖係公罪。均不准其抵銷。○二十七年

諭。朕恭讀

皇祖高宗純皇帝諭旨。嚴飭各省督撫。於年終密考。將

該學政考試實在有無弊竇。及士子輿論是否翕然。據實詳細奏聞。原以嚴考成而肅功令。

聖諭煌煌。洵宜恪遵謹守。惟相沿日久。該督撫等於年終密考。率皆以場規整肅。士論悅服為詞。習成故套。毫無切實考語。殊非秉公覈實之道。現在學政內雖尚無被人指摘之員。而各省學政盡皆廉明公正。朕亦未能深信。嗣後各省督撫等務宜破除情面。認真訪察。如該學政等不公不勤。或徇私壞法。以及約束幕友家丁胥吏人等不能嚴肅。甚至精神疲敝。不能振作。有玷厥職。均著該督撫等秉公具奏。不得仍以

空言塞責。儻意存見好。徇隱不舉。別經發覺。惟該督撫等是問。○二十八年

諭。前據琦善奏四川學政徐士穀嗜酒任氣。當因其尚無贓私款迹。僅予交部嚴加處分。茲據該部議奏。徐士穀身任學政。場規固應嚴肅。何得於酒後任性。將應名稍遲之文童。逐出四百餘名之多。復將具保之廩生責打。以致外間嘖有煩言。徐士穀著即照部議降四級調用。以為學臣不自檢束者戒。○咸豐四年諭。貴州學政黃統奏途次被匪毀失文卷。自請議處一摺。該學政由興義試竣回省。途次新城猝被土匪闖

入衙署。肆行搶劫。該學政身受多傷。隨帶文卷冊籍。均被毀失。所有貴州安順興義兩府屬科試各卷。著免其解部磨勘。黃統未能先事保護。著交部照例議處。○五年

諭。本日貴州學政鮑源深。由五百里馳奏貴州勦辦苗匪並軍營需餉情形。均係巡撫蔣蔚遠節次奏聞。業經降旨飭辦之事。殊覺徒勞驛站。各省學政職司考校地方公事。本不與聞。其或該省大吏廢弛不職。措置乖方。原准學政彈劾。然非事機緊迫。亦止專差齎摺。豈容輒由驛遞。又如編修張金鏞由山西考官。簡

放湖南學政具摺謝恩。亦由三百里馳遞。尤屬非是。嗣後各省學政除派辦防勦事務。及實有緊要事件。迫不及待者。准其發報外。其餘概不准擅用驛遞。以示限制。又

諭。四川學政何紹基奏縷陳管見一摺。學政無論官階。悉與督撫平行。惟年終有學政聲名之奏。原係互相糾察。並非遂為統屬。學政苟稍知自愛。何至卑汙要結。何紹基身任學政。而以此言入奏。尤屬非是。況欽差查辦事件。理應慎重。該學政以奏參各件。閤不使知。心懷不平。亦屬私見。此外各條。皆非學政分內之

事亦非今日救時急務。均著毋庸置議。○七年

諭前因河南學政俞樾出題割裂及坐索棚規各款。疊經降旨交英桂督同藩司瑛棨秉公查辦。並調查卷冊據實具奏。茲據英桂奏稱詳訪輿論。俞樾考政尚嚴。惟所出題目確有數題割裂太甚。不成句讀。尚無坐索棚規及輕浮卑鄙各款。業經革職。著毋庸議。學政為士林表率。制義代聖賢立言。文理之醇疵。足覘人品之邪正。若命題既上下割裂。甚至不成句讀。又安能闡發聖賢義理耶。此於士習文風大有關係。嗣後各省學政考試出題。即防勒襲舊文。間用搭截。亦

須句讀分明。斷不可如俞樾之文義難通。幾於戲侮聖言。自取咎戾。○同治四年定。嗣後各省選舉優生。由學政考試頭二場後。比照選拔之例。會同督撫覆試驗看。將頭二場並覆試卷。一併送部磨勘。毋致參差。○光緒二年議准。嗣後各省學政查出窩槍包攬招搖。飭令提調緝拏之案。不能獲一者。比照槍手脫逃不實力嚴緝例。加等議處。初叅罰俸一年。再限一年緝拏。限滿不獲。罰俸二年。人犯照案緝拏。